

ALAHADY - FAHA 5 MANDAVANTAONA - A



***Izaho no fahazavan'izao tontolo izao, hoy ny Tompo;
izay manaraka Ahy no manana ny fahazavan'ny fiainana.***

Ry Kristianina havana, tamin'ny Alahady lasa teo nandinika manokana ny toriteny teny antendrombohitra ary azo lazaina fa io no sata fanorenana ny vahoakan'Andriamanitra tahaka ny nanorenany ny tany Sinai nanoloran'Andriamanitra an'ireo teny folo, ny fahasambarana valo nohalalinintsika dia sata fanorenana ny fianakaviamben'Andriamanitra amin'izao nidirantsika amin'ny famonjena nentin'i Kristy izao. Izany no banjinintsika amin'ity taona handalinantsika ny finoantsika izao dia i Kristy miara-belona sy miara-dàlana amintsika ka mivelona eo anivontsika ny fahazavana. Nohalalinintsika izany tamin'ny fankalazana ny nanolorana ny Tompo tamin'ny 02 febroary teo fetin'ny jiro masina. I Krsisty no fahazavana manilo ny fiainantsika, raha mandray an'i

Kristy koa isika tahaka an'i Simeona, eo am-pelantanantsika fa indrindra isika mandray azy amin'ny kominio masina, dia isika ihany koa no zary fahazavana manilo ny fiainantsika sy an'ireo manodidina atsika ary manambara ny maha vahoakan'Andriamanitra atsika izany.

Manomboka amin'izao Alahady faha-5 mandavantaona izao dia alalinintsika tsikelikely ny hivelomantsika an'ireo

fahasambarana valo. Tsy hoe araky ny hevitr'izao tontolo izao izany fahasambarana izany fa fandaharana sy toetra hivelomantsika araka ny sitrapon'Andriamanitra.

Vakiteny I : Iz. 58, 7-10
Tononkira : Sal. 111,
Vakiteny II : 1Kôr. 2, 1-5
Evanjely : Mt. 5, 13-16

Inona ary izany toetra izany ?

Atolotry ny Eglizy ho atsika androany ho fanohizana ny fetin'ny jiro fa mivelona ny hafatr'i Kristy isika dia zary fahazavana sy fanasina eo amin'ny fiainantsika. Isika no Eglizy, isika izay vita batemy no tempolin'Andriamanitra izay manolotra ny tenantsika amin'Andriamanitra.

Ambaran'ny vakiteny voalohany (Iz. 58, 7-10) izay horenesintsika koa rehefa tonga ny vanimpotoananan'ny karemy dia ny fifadiana. Matetika dia heverintsika fa ny fanajana sy fanarahana ambokony ny fifadiana no tena fiainana sy ny fivelomana an'ireo sata izay manambara ny fandraran'Andriamanitra an'izao sy izao. Tsy izany ny teny folo na ny tenin'ny fiainana nomen'Andriamanitra tao Sinai. **Milaza Izaia mpaminany fa ny fifadian-kanina tena izy dia hahatonga atsika hanasoa ny hafa, izay ny fahasambarana, izay ny fahazavana sy ny fanasina. Raha isika manasoa, tsy hoe mifady hanina ho an'ny tenantsika isika, tsy hoe "regime" ho an'ny tenantsika ny fifadian-kanina fa atao mba hisokafana ho an'ny hafa mba hazahoan'ny hafa fahasoavana ary dia izany no hamafasin'Izaia mpaminany** "*Raha esorinao tsy ho eo aminao intsony ny jioga, ny fanambàhana sy ny teny manala baraka*"; *raha manome ny haninao ho an'ny noana ianao, sy mamoky ny fanahy miferin'aina; hiposaka ao amin'ny maizina ny fahazavanao, hamirapiratra hoatra ny mitataovovonana ny haizinao.*" Izany tokoa ny lalam-pahasambarana.

MAMETRA PANONTANIANA ISIKA ahoana ny hahafantarana fa mino ?

Raha mandray an'i Jesoa ka manome sy mahafoy ampaharetana ary ao anatin'ny fanompoana sy fanetrentena ka zary ho fanasina sy fahazavana isika eo amin'ny mpiara-belona amintsika. Raha manatanteraka an'izany satria hitondra aina ho an'ireo manodidina atsika isika dia azo lazaina fa mitondra hasambarana tsy ho anao ihany fa ho an'ireo manodidina anao.

Vokatry ny teny folo tao an-tendrombohitry'i Sinai izany ka mbola tohizan'i Jesoa tamin'ny fampianarana ny fahasambarana valo hitantsika amin'ny evanjelin'i Md Matio ary amin'ny toerana maro samy hafa no miteny ny fampianaran'i Jesoa izy mba hanampy atsika hivelona ny maha Kristianina atsika.

Hazavain'i Md Matio ny teny hevitra ny fahazavana sy ny fanasina ka anjarantsika ary no mivelona an'izany amin'izao fiainantsika izao, i Kristy ilay nolazaintsika fa fahazavana tamin'ny nankalazantsika ny fetin'ny Jiro masina. Ny Evanjely anio milaza amintsika "*Aoka hazava eo imason'ny olona tahaka izany koa ny fahazavanareo, mba hahitany ny asa soa ataonareo, ka hanomezany voninahitra ny Rainareo izay an-danitra*".

Ny zanaky ny mazava dia tsy misalasala fa izay ao anatin'ny maizina no maro zavatra manembatsembana. Raha miaina ny maha zanaky ny fahazavana isika dia manatanteraka ny marina, ny rariny sy ny hitsiny, manao ny soa ho an'ny hafa izay no mitondra amin'ny tena fiadanana marina. Ho an'izay te-hanatanteraka an'izay araka ny voalazan'i Md Paoly amin'ny vakiteny faharoa (1Kôr. 2, 1-5) "*Fa ninia tsy nahalala zavatra hafa afa-tsy i Jesoa Kristy aho taty aminareo, indrindra fa Izy voafantsika tamin'ny Hazofijaliana*", izany hoe ho antsika izay mandray an'i Kristy ho fiainana, mamantsika ny fiainantsika ao amin'i Kristy, mifikitra ao amin'i Kristy dia izay fiainan'i Kristy no fiainantsika ka amin'izay ny ataontsika rehetra dia tsy hoe kobaka ambava fotsiny na fitoriana fotsiny araky ny lazaintsika matetika hoe ny teny manaitra fa ny atao no mahasarika.

Araka io hafatra tao an-tendrombohitra io :

- aoka ny fiainantsika manontolo ho fiainana manambara an'i Kristy, kristianina manambara an'i Kristy amin'ny ataontsika rehetra

- aoka mba hivelomantsika mandrakariva izay fiainana ao amin'i Kristy izay ka ny soa izay ataontsika dia fanomezam-boninahitra an'Andriamanitra, amin'izay koa ny soa ataontsika hanasoavana ny hafa ka hanazava ny olona rehetra isika ho fanasina sy fahazavana ho an'ny hafa.

-enga anie isika amin'ny ataontsika rehetra mba manambara an'i Kristy tokoa isika ka tsy ho hitan'ny olona hampisalasala azy ny finoantsika.

Izay no tsy maintsy banjinantsika mandrakariva an'i KRISTY - ATAONTSIKA EO ANIVON'NY FIAINANTSIKA MANDRAKARIVA I KRISTY.

Tsy midika izany fa lavorary isika, tsy ny lavorary no ambara eto fa ny hoe masina isika, ny maha-masina atsika dia satria ao amintsika ilay masina dia i Kristy. Kristianina isika, rehefa masina isika dia ny ataontsika rehetra dia mitondra an'izany fahamasinana izany. Io no ambaran'i Jesoa raha milaza izy hoe "*Ary tsy misy olona mampirehitra jiro, ka mametraka azy ao ambanin'ny vata famarana, fa eo ambonin'ny fanaovan-jiro no apetrany mba hanazava izay rehetra ao an-trano*"

Tsy ny fahalavorariana no tadiavina ary tsy ho lavorary na oviana na oviana isika fa ny fiainantsika ao anaty fahamarinana, ao anatin'ny fampanjakana ny rariny sy ny hitsiny ary ao anatin'izany fifankatiavana izany no tadiavina. Manonofy isika raha mitady hoe fahalavorariana izany fa ny tadiavina dia isika mitondra an'i Kristy, manome an'i Kristy ny ataontsika rehetra, mahafoy ho an'i Kristy amin'ny ataontsika rehetra ary tsy indray mandeha ihany fa maharitra, izany no asa fanasoavana lazain'Izaia mpaminany amin'ny vakiteny voalohany.

Ry Jesoa Tompo ô, ianao tokoa no hany fahazavana ka ny fahazavanao no manilo anay.

Enga anie izahay hanokatra ny fonay aminao mba ho tempolinao tokoa izahay ary tsy manana hafa hitokiana izahay hafa tsy ianao ary ianao voafantsika no làlam-pamonjena ho anay ary enga anie izahay hifantsika aminao tanteraka tahaka ny nataon'i Md Paoly ka amin'izay koa izahay ho zary fahazavana sy fanasina amin'ireo mpiara-belona aminay ary hanao asa soa amin'ny fiainanay manontolo mba ho fanehoam-boninahitra ny anaranao masina. Amen

Mompera Arseveka Mgr Benjamin Ramaroson